

煙

嶼

樓

文

集

烟嶼樓文集卷六

鄞 徐時棟同叔稿 甥葛祥熊豫齋校刊

書一

與友人論喪中應試書

吾子不弔邁羅大感僕以平昔交遊親唁而與於執紼之役竊見賢昆季哭泣之哀慘於嬰兒歸棹與諸君子私歎謂近今所寡有心常怛怛媿服無已乃者客自君所來謂令弟將赴試有司而僞爲後於他人者僕未之敢信今果然矣乃不禁憤懣終日而不能無大白於君子也國有法曰凡居父母之喪宦者解任士子輟考夫

親喪固所自盡彼其能任與能考與否聽之已耳曷爲而禁之蓋聖人不忍以不肖待天下若曰此其人在三年中方哀痛怨慕鬱結膠固而不可解責之以任事將叢脞而失職課之以肄業將荒落而曠亂苟反是焉此其人殆善忘其親者也夫是故禁之也夫未有家而不本於禮者也禮者所以待君子而法者所以繩小人古之君子慘怛呼號而不自己先王憐之謂是將終其身而不能一日殺也於是乎爲之飲食起居衣服之禮有日月焉有變除焉始以稱其情而繼以節其哀而緣情而制禮則有廢誦廢業之文後之達者或遂視父母之

死爲人事之常焉爾先王懼其漸入於老莊墨翟之教而流至於無父也於是乎爲之飲食起居衣服之制而其尤著明而易於遵循者則有去任罷試之律今將爲君子焉禮在而法無問矣將爲小人焉禮不必爲我輩設也其如法何哉而僕則嘗聞今人之言曰喪而貧可以應試其不貧則不可駭詰之則曰富家子冒匿喪之禁將有訐告而魚肉之者若窶人子也誰問之嗟乎嗟乎富人子之幸而得尙有其親也豈不賴一二眈眈者之環伺我而迫致之使不敢不有其親耶若不幸而爲貧者之父母則其死如不死固已久矣又不幸而得志

華服而蒙衰麻之身以謁其主司丹刺而題不祥之名以見其宗戚而爲之姻親鄰里交遊宗族者相率醵金錢走其家爲賀其家乃張樂陳宴懽呼叫笑呶醉累日夜不止或稍稍訾議之無智愚賢不肖皆大驚愕指爲迂僻怪妄之言掩耳離坐而疾走嗟乎嗟乎此其姑相忍而爲此態耶抑其良心喪亡浸潤淪浹已久而固已出於自然者耶吾子試思之如不望其成名也赴試奚爲者如望其成名也亦幾有不出此者乎且法之所禁未嘗不明且備也今求之於飲食起居猶有遵法而無違者乎衣服之制若不敢踰焉然而不帛而已其衣布

之細密而輕柔者無異乎帛也不錦繡而已其衣裳冠履盤紉刻畫異色閒錯爭妍而鬬麗者無異乎錦繡也此其表於外者爾至其褻衣與其燕寢之所服用吾不得而知之矣雖然指其藏於衷者猶將深祕而曲諱之也斥其暴於外者猶將赧顏而遜謝之也獨至應試冠朱纓曳華履姣好之服喜笑之色豈惟不指而斥之且羣以爲固然無足怪嗚呼卽衣服之制而喪心害理至於此極子曰衣錦安乎猶謂夫期之後者也今不數十日而泰然安之僕誠不解其何心矣或曰凡爲父母者未有不願其子之成名也幸而得之吾親將含笑於九

原而奚其小節之苛也夫父母豈惟願其子之成名抑
未有不樂其子之安居而飽煖者也今不食焉啜粥焉
蔬食焉倚廬而枕塊衰絰而苴麻苟無故以爲是父母
雖不慈始必涕泣而禁止之苟宜爲是而不爲死而有
知且不以子數庸冀其身外之名乎且履歷掌於有司
弗可改也今日爲人後不能終三年而更之也則是是
子也將終其身謂他人父卽由此成大名登顯秩而與
其所生已幾幾乎秦越人矣越人之肥瘠何與秦人而
猶曰必含笑於九原信乎或又曰先人殆有遺命焉幸
而得之以順其心失寸得尺宜亦可也夫古道自處如

子之先人豈宜有老耄之亂命哉僕固深信其必未嘗有也雖然喪而試者多矣僕又不能信其人之父母之必無是命也鄰有老而生子者比當娶子婦而其人病革乃爲遺命曰我死必無廢斯舉也宗族朋友而強以國法繩我吾家人徇之爲不孝旣而其家以質於僕曰從之也殆不忠違之也殆不孝且奈何僕笑應之曰子乃今而將爲忠乎爲孝乎以吾所聞忠孝固不若是其幾也今而翁有遺命焉曰必犯上作亂不者非孝子子乃今而將從之乎故天下之理無小大一而已矣知有輕重而權衡之雖顯親揚名姑徐徐焉爾苟惟命而已

雖犯上作亂庸非孝乎嗚呼至性至情至今日而益薄
僕自視與今人曾無少異而清夜汗下猶不敢肆然爲
無忌憚之小人者尙知有法耳我何以當去任我何以
不得與於試返而求諸心或一時焉一息焉得稍動其
哀痛怨慕之良則不可謂法之無裨於我也賢昆季至
性過人無待激發今或者過聽旁觀之慫慂而不能無
動於世俗之好以有此大惑也號哭之聲猶在吾耳令
弟而苟赴試哀痛慘迫將終不能抒所學也不然夫豈
越數十日而遽忘之何其速也往者僕與吾子論

本朝人物居官講學亦推李文貞而每讀彭給諫之奏

竊掩卷爲文貞深痛惜之知吾子今日猶此情也僕聞
吾子親交中有勸而無沮故不能已於言焉不然此禮
此法豈尙爲吾子之所未聞抑吾子貧士又豈畏人之
訐告而魚肉者而煩僕之嘵嘵耶僕又聞前年有訟匿
喪於典試者典試不答怫然以爲多言嗚呼主持風化
者而亦出此是尤僕與吾子之所深憂也

書往答書媿
謝竟不試

答友人問夏后氏藝文書

某頓首言前月僕與吾子會於全氏縱論及夏諺客有
言夏代文字自夏書外獨存此諺者僕笑而不答是時
主賓方雜遝而吾子遽命僕陳說之乃者又書來請畢

其詞情意懇懇推獎甚過何吾子好學之深而下問之勤也夫一代之制作雖其放失殘缺之已久亦豈俄頃閒所能悉數者抑僕實舛陋寡學其去客殆不遠徒以吾子之誠不敢不竭言之故卽平昔所聞見者考其存亡與其眞僞傾筐倒篋以爲吾子告僕聞之言必有端今何端乎則請以漢藝文志爲例而數夏之典籍焉連山夏易也周官曰其經卦八其別六十有四太卜筮人掌之與歸藏周易爲二易其書早亡故漢不著錄唐志十卷司馬膺注者則隋人劉炫僞書也然先儒謂揚雄太元經實依連山以準周易桓譚曰連山八萬言又曰

連山藏於蘭臺阮籍曰庖犧布演卦變後世因之禹湯之經皆在而上古之文不存皇甫謐曰其卦以純艮爲首艮爲山山上山下是名連山其作帝王世紀與酈道元注水經並引其書夫漢志本劉略劉向旣不得見而揚桓以下反得見之何也金樓子由歸藏推連山斷爲夏書則其書在梁又佚其著書篇所稱連山三秩三十卷者元帝自著書也於夏易無與故孔穎達曰二易並亡若陸佃邵博所見卽隋人僞本耳久之亦失而黃佐六藝流別載繇辭基詳僞三墳稱山墳爲連山是無知妄作又劉炫之重僞矣夏書存於今者獨禹貢甘誓而

吾謂堯典臯謨亦夏書也堯典已紀舜崩非夏史紀之而誰紀耶故左氏引賦納以言明試以功車服以庸稱夏書而墨子亦云尙書夏書其次商周之書至五子之歌與嗣征僞書也嗣征佚語康成注禹貢嘗引之而吾鄉先生王伯厚氏以爲出張霸百兩篇中其灼然可信者左傳十一引夏書莊八僖二十五文七咸十六襄五又十四又二十一又二十六昭十四又十七國語三引夏書周語二引晉語一引墨子七患篇引夏書呂覽諄大篇引夏書雖奇零叢殘信足寶貴而梅氏剽竊竄亂無有子遺

國初朱氏彝尊作逸經考不復采引僕嘗與馮太史書

所爲深議其過者也司馬遷史記引夏書於河渠書中
王肅作家語引夏書於顏子篇中是其真僞未易遽定
至墨子兼愛篇明鬼篇竝引禹誓非命篇引禹之總德
非樂篇引啟之武觀則不但遺句而已竝可補夏書篇
目之亡者也夏后氏始制禮故禮器曰三代之禮一也
夏造殷因夫子曰殷因於夏禮又曰夏禮吾能言之然
而其時已有杞不足徵之歎蓋夏禮之亡久矣而惟夫
子能言之其平日所講論七十子之徒相與究明而傳
習之以筆之書凡散見於大小戴記與周秦諸子書中
所稱夏后氏云云者皆是也僕嘗欲集而綴之爲夏禮

略亦足以存什一於千百也且損益從時而其名篇蓋大略不異如周禮有冠禮饗禮而郊特牲曰諸侯之有冠禮夏之末造也王制曰養老夏后氏以饗禮則當時名篇亦概可知也至夫樂章雖周樂之存亦寡矣何況夏樂而其名尙時見他說大夏禹樂也尙書大傳又稱禹作大唐之歌又曰招爲賓客而雍爲主人始奏肆夏納以孝成舜爲賓客而禹爲主人又有大化大訓六府九原之樂康成曰四章皆歌禹之功淮南子稱夏后氏樂曰夏籥九成六佾六列六英呂氏春秋曰禹命皋陶作之又其後王所作者山海經曰夏后開上嬪於天得

九辯與九歌楚辭注曰九辯九歌啟所作樂也夫九歌
爲啟所作本之屈原無可疑者左傳引夏書勸之以九
歌而釋之曰九功之德皆可歌也謂之九歌故王逸曰
啟能修明禹業備禮樂也晉人不察以傳所引夏書竄
入大禹謨中是九歌爲禹樂矣可乎九招舜樂也啟又
嘗修之竹書紀年曰夏后開舞九招汨乎季世列女傳
稱桀作爛熳之樂而夏社屋矣此夏樂之大略也周之
時夏法猶存左氏傳曰夏有亂政而作禹刑荀子君道
篇曰禹之法猶存而夏不世王其傳於今者周書大聚
解引禹禁周語引夏令又引夏后氏時倣左傳引夏訓

尸子引禹喪法呂氏先識覽稱夏之衰太史抱其圖法以奔殷皆其類也左氏引夏書有之昏墨賊般皋陶之刑也是禹刑爲皋陶所作皋陶刑法受諸舜其詳在虞書則夏法亡而於虞書猶足彷彿之左氏又引曰適人以木鐸徇於路官師相規工執藝事以諫又引曰與其殺不辜甯失不經此則大禹作刑立法之仁心精意可以括一代刑法之全而垂百王之典則者也較之下車泣罪之說其言尤足徵信僕又聞之墨子之教本諸有夏然則其辭過篇所引爲宮室與爲衣服之法節用篇引嫁娶與節用與飲食與節葬之法節葬篇引葬埋之

法其皆出自夏法者乎法家之外有雜家漢志著錄者
曰大令三十七篇令古文禹也班孟堅曰傳言禹所作
其文似後世語僕按莊周劉向賈誼諸書多載古帝王
語所引禹言豈卽出自大令者邪雜家又著孔甲盤盂
二十六篇或曰黃帝史也或曰夏后孔甲也今不存無
能考核然僕聞夏人尙忠其文亦簡施於烝彝鼎者不
過一二字故款識家多載商周器銘辭而夏文絕少今
其銘盤盂者乃得二十六篇之多邪鬻子載禹所作箕
箒銘其言類春秋六國時人而尙書璇璣鈴乃云禹元
圭之上有刻辭文曰延喜玉受德天錫佩更怪誕無足

究詰者夫龍符玉牒荒唐之言也岫嶠碑文世盛傳之
果可信乎而九江記乃稱禹刻石彭蠡湖十洲記稱禹
刻石鍾山辭亦不載載亦不足貴凡此比類難一二記
姑因數盤盂而爲吾子終言之乃其歌詩莫古於五子
之歌而書亡矣晉人僞爲之殊不類其錯見他籍而未
敢決其眞僞者古今樂錄載禹治水作歌曰襄陵操吳
越春秋載塗山之歌呂覽稱塗山女歌僅載一語曰候
人兮猗古琴疏載帝相源水之歌其辭卽荀子法行篇
所稱爲詩詞者呂覽音初篇稱孔甲作破斧之歌而亡
其詞新序詩外傳並載桀時羣臣之歌尙書大傳載夏

人飲酒而醉而相持而和之歌又載伊尹更歌太平御覽引符子載龍逢行就炮烙之歌夫夏諺亦歌詩類也註孟子者未之詳察以今也不然之今屬晏子時遂僅以前六語爲夏諺詞而以後十語爲晏子之說僕大不以爲然也向在全氏已備告吾子今略之由歌詩類推則有箴辭有祝辭墨子稱夏箴之辭逸周書文傳解兩引之呂覽新序俱載夏人祝網與湯更祝之辭是皆文字之在夏后氏者也夏文之傳希矣故核諸漢志門類多弗備而惟數術之略曰天文曰厯譜曰五行曰蓍龜曰雜占曰形法則雖叢殘滅絕而或存或亡其名猶有

足以充數者夫子曰吾之杞而得夏時焉康成曰得夏
四時之書也其書存者有小正司馬遷曰孔子正夏時
學者多傳夏小正今小正在大戴禮中妣氏一代遺書
完好而無敢疑議者此其碩果也而王禕序趙詵仲集
解獨蚩蚩然疑之謂孔子取夏時何以不與禹貢同列
於百篇詵仲曰鄭以小正爲夏書按以小正爲夏書不始自康成趙亦失考
本無左驗所記昏旦中星與星之見伏率與月令月紀
時訓不合唐一行推以厯術知其實在夏時其爲夏書
無疑禕又難之謂安知非精厯數者逆考而遡推之求
其故以僞爲是書乎嗟乎信如禕言則堯舜禹湯周孔

果有其人乎安知非工語言者造爲神聖以欺我乎忠
文疏於考證殆不足辨善乎劉戡山之言曰夏小正丹
書蔚然彝鼎實三禮之冠冕先輩又言世儒明知月令
爲呂不韋作乃尊以爲經夏時孔子所取反舍而不習
然而雖未立之學官而旣已入於禮家尊爲六藝矣若
夫宣夜夏天文也瑞厯夏厯譜也洪範夏五行也玉兆
夏蓍龜也致夢夏雜占也山海經夏形法也請終數之
史記曰傳天數者有夏昆吾漢書亦曰夏有昆吾賀道
養渾天記曰昔記天體者有三二曰宣夜夏殷之法也
蔡邕虞喜皆謂宣夜之法絕滅葛洪亦云宣夜之書亡

而其抱朴子中載宣夜說百三十言乃漢郎中郊萌記
先師所相傳者蓋有夏星官之書可考見者如斯而已
左傳引夏書曰辰不集於房瞽奏鼓晉夫馳庶人走是
又其言星變之見於經者漢志載六家厯有夏殷周魯
厯十四卷是夏厯在漢無恙也律厯志曰堯育重黎之
後以授舜舜亦以命禹蔡邕曰厯法黃帝顓頊夏殷周
魯凡六家各自有元續漢志曰黃帝造厯元起辛卯顓
頊乙卯虞戊午夏丙寅殷甲寅周丁巳魯庚子又云永
元十年太史霍融上言官漏刻率九日增減一等不與
天相應不如夏厯然漢以來諸儒多疑其書劉向五紀

論曰黃帝厯有四法顓帝夏周並有二術詭異紛然孰識其正宋志祖冲之曰夏厯七曜西行特違眾法劉向以爲後人所造書正義曰古時眞厯遭戰國及秦而亡漢存六厯皆秦漢之際假託爲之信如所云其存也不如其亡也而僕則謂夏之時固有厯也其名書曰日月星辰瑞厯荀子天論曰治亂天耶曰日月星辰瑞厯是禹桀之所同也禹以治桀以亂治亂非天也夫古之王者多矣仁君暴主亦眾矣不數異朝之君而專稱禹桀僕故曰日月星辰瑞厯者是有夏之書也此眞夏厯也洪範五行之祖也箕子曰天乃錫禹洪範九疇不謂之

有夏之書不得也雖亡而在周書者大略具矣識緯之家異說蘊起乃有河精授禹河圖殳入淵之說其名號多至數十如挺佐輔帝覽嬉之類皆是也其書既焚其軼時見祕怪淺陋無足觀者乃欲悉數其名以當夏之五行未可也而其著龜則曰玉兆左氏傳引夏書曰官占唯能蔽志昆命於元龜周官太卜曰掌三兆之灋一曰玉兆玉兆夏兆也杜子春謂帝顓頊之兆康成雖從之而答趙商不以爲然也其經兆之體百二十其頌千有二百康成曰頌者繇也墨子耕柱篇載夏后開鑄鼎使翁難乙卜於白若之龜辭曰云云乙又言兆之繇曰

云云僕謂前所稱鼎成三足而方者兆辭也卽經兆之體也後所稱逢逢白雲者兆之繇也卽頌也其他張衡靈憲所引翩翩歸妹偽歸藏所引不利出征皆玉兆之偶見者書在漢猶存漢志著錄夏竈二十六卷者是也其占夢書亡矣而周官存其錄春官曰太卜掌三夢之灋一曰致夢康成曰言夢之所至夏后氏作焉者是也夫宛委石簀之山青玉白銀之簡未可盡信而所云中經天下經者不可誣也世儒皆稱禹治水伯益著山海經自東方朔董仲舒劉向王充諸儒靡不尊信乃或以爲僞託太史公大宛傳引禹本紀亦其比類而書不傳

太史公曰言九州山川尙書近之至山海經禹本紀所言怪物余不敢信也蓋意亦僞之然僕觀其書博奧宏麗固不類禹貢而與小正相近顏之推曰山海經禹益所記而有長沙零陵諸暨後人所屬非本文也其說近是尤袁遷指爲先秦人作僕未敢以爲然也且史遷之不信者何哉爲其語怪也然而重常之鳥貳負之臣兩面之客長臂之衣世不有怪物則已苟有怪物精驗潛效必於是乎知之論衡謂非禹益行遠山海不造僕謂非聖人知足以知物雖行遠亦不能作也舊校三十二篇劉歆定十八篇漢志十三篇隋志二十三卷今本十

八卷蓋劉氏校定本至如括地象地統書之屬竝稱禹
作語出緯書無可信者矣凡僕之知者如此夫一代之
制作縱極明備苟至乎鼎革喪亂之秋未有不散亡殆
盡者固不必推秦政爲戎首也夏之初王風樸政簡其
文字殆不多作況古者簡冊繁重未易遷舉又自秦燔
以後遭兵燹者更不知凡幾此其傳之幾希也固宜然
而閱世至於三千餘年之久遺書遞立之學官山經小
正巍然完好其單章隻句分布載籍者若溜澗之沙計
兒不能數禮樂刑政時令制度之大卜筮占驗歌謠鄙
諺之細雖未或賅備尙足以考見一王崖略僕妄以爲

未必非大禹明德之所呵護者而客乃欲以夏諺盡之
此僕之所以笑而不答也雖然尸佼不云乎井中視星
者所見不過數星夫僕亦坐井而觀天者則竊慮夫僕
之笑客而更有笑僕於後者也惟吾子擴其不備而教
益之幸甚某頓首

三百篇有商頌而無夏詩諸子百家引逸詩者亦絕
不之及蓋其亡久矣或曰公劉在夏世篤公劉夏詩
也故明人何元子作詩經世本古義以時代爲後先
取公劉冠首然舊註謂是周公作則未可定爲夏詩
也元子說夏詩在少康之世凡八篇公劉以外曰七

月曰甫田曰大田曰豐年曰良耜曰載芟曰行葦又
大中閒毛詩博士沈朗進新添毛詩四篇以虞人之
箴爲禹詩此皆自著一家之言姑聽之可也余又按
逸周書世俘解乙卯籒人奏崇禹生開三終或謂崇
禹者夏詩歌禹德也生開者夏詩歌啟功也然其詩
已亡未可想像得之若但以禹開二字爲據則商頌
禹敷下土方周雅維禹甸之維禹之績皆將指爲夏
詩乎此又毛詩博士之故智矣

與朱述之司馬書

述之先生公祖大人閣下睽違道貌十二年矣邇年音

問亦復曠疎每從省中諸君詢問近狀知前年曾經奉
諱又知金陵失守圖書蕩然未識骨肉都得團聚否無
恙否田園尙有存否耿耿此心無日忘之段鏡湖觀察
宋思贊司馬亦嘗道及一二而但是仿佛亦不能有的
音也如何如何尙希詳悉告知以慰鄙懷不肖自遭大
故名心淡然以先大夫葬地不吉營度六年始以去冬
得葬蒙賜志銘光榮幽室前不肖求志尙擬分葬故大
作志銘凡二篇今旣得合葬未敢併合爲一乃聯綴書
之而不肖補記其由及葬地月日於後本當親謁叩謝
事冗道遠不能如願謹具拓本竝箋箋東帛聊答盛意

於萬一臨發書三叩首先先生當遙領此情也文中於事實職銜或有不合大膽僭易一二其餘竝依來本四明志刻成既二年矣以尙未覆校故未印行欲屬人代校則恐其疏忽自校又無暇日遷延至今常繫於心今秋定當了此一大願先生許爲作序何以未到今將所刻體例零紙錄奉又附刻鄙著校勘記三十一卷亦望零作一序其體例亦附來誠欲遺棄一切著作自娛而一年之中強半爲他人作嫁衣裳丁未下第南歸作徐偃王志爾時先生曾賜大序其書尙未刊刻近將刪補之付手民而未能也由近及遠擬先修寒家譜牒去年作

本支家傳尙未脫稿臘月閒成呂氏春秋雜記一書凡
八卷其中校正高舉注語尙有可觀以視錢唐梁氏呂
子校補竊自謂過之現方搜羅宋元以前四明詩文先
詩後文詩已得三百餘家前數十年吾鄉袁陶軒徵君

鈞

慈谿鄭三雲司馬

辰

各有此舉

弟

竝得其手稿增刪

之閒究易爲力若書成較李杲堂先生耆舊集多不啻
倍蓰矣然吾鄉在宋元有專集而至今存者不過三十
家而寒家所有者僅得其半則豈有其集尙在人閒而
耳目未賅遂可甄綜風雅之理若竟棄去之則所收三
百餘家者又將蕩爲飛塵矣以是不得不仰求將伯之

助今據四庫書目錄其集名下注已有未有其未有者
敬求廣爲搜採或以尊藏見惠或從閣本借鈔務求必
得其費若干統希示知奉還大君子方主持風雅爲吾
黨指南必不至褻如充耳置之罔聞不稍爲此邦文獻
一垂念也臨楮至此又敬謹望書二叩首萬望先生憫
其苦衷曲賜周旋此外凡文章之見於他書及四明遺
事之紀載於筆墨者均希隨筆錄出惠寄擬作四明遺
事及四明職官考四明藝文志三書竝以宋元爲斷卽
如職官凡宋元文集中幾於無集不有鄙意自郡將州
佐至簿丞巡檢無不收錄師儒山長之在元者亦備登

於冊其軼事詩文之有關於四明者卽載本人之下書
成亦當可觀也前月從故家得尹和靖集其中居然有
吾鄉高司業閱詩一首爲自來選宋詩者所未有吾鄉
諸先輩亦徧求司業詩不得得此爲之狂喜者累日謹
以附告知已因洪張伯同年返里謹奉書一函拉雜滿
紙未罄欲言何時得見顏色一暢懷抱伏惟爲道珍攝
諸維亮簪不宣治愚小第徐時棟頓首

附奉先大夫墓志拓本三十副外新刻鄙著六種共計
十六副藉呈大教又奉表裏一副謹求哂納

再者去年擬刻所作古文稿整理之約得四十卷已寫

樣尙未上板先生見鄙著多矣更欲恃愛求大序一篇
未知許之否集曰烟嶼樓文集烟嶼爲月湖十洲之一
先人故居也近以人多屋少弟已於乙卯四月遷居城
西門外顏曰城西草堂而集曰烟嶼者不敢忘故居也
古今體詩則更不敢自信且爲後圖時棟再頓首

與董覺軒論碑志不書生年書

乙丑

友朋晤聚交暢所言別而索居往往追理頃者雜還論
對之言而忽有觸也則將急發吾意中所欲云者以重
告之而其人旣去此所以別足下不數十日而遂有書
以貽足下也愚嘗謂古大家碑志不書生年足下信之

乃者至自海上若翻有疑焉而舉金石例中稱昌黎薛君志爲據是時不遑校檢姑妄以爲是偶然耳未足難吾說也暇而思之昌黎於古文爲不祧之宗終不當有偶然者重發其書乃始知吾言信不謬而歎爲例者之妄作也薛君志曰詔拜國子助教分教東都生元和四年年卅七二月十四日疾暴卒凡金石恆例先書某年月日卒復書年幾何逆推之而生年可知也昌黎碑志多變文或先書年幾何復書某年月日卒若此者多有難備舉或先書某元幾年次書年幾何次書某月日卒此志與清邊郡王碑是已雖自以意參錯變化要其不

書生年一也今爲例者誤東都生之生屬元和而卽以爲韓書生年之證則集中碑志六十餘篇幾見有不書

卒年而轉書生年如此志者而第於薛平異之唐制博

士助教皆有分司東都者或但稱東都

如唐書昌黎本傳云元和初權

知國子博士分司東都

或稱東都生

此志外如周況妻韓氏志云愈於時爲博士乞分教東都

生固不能據其一以爲之辨且吾安用是繁稱博引與

爲例者相詰難哉浸假薛君生元和四年年四十七是

當卒於宣宗大中九年者而昌黎卒穆宗長慶四年至

是其卒也三十有二年矣而能志其墓乎古文雖小道

然未有不本於經者堯典紀二聖但書崩年顧命於成

王始具月日夫子作春秋詳記天王至卿大夫崩薨卒
葬而月日之不書生年其獨生魯莊者爲當時舉典
禮公穀傳春秋以夫子爲萬古一人而附記其生是皆
特書非恆例尙書春秋史家之祖也故良史如司馬班
范亦紀其帝王生時符瑞而不具年月日後世乃以生
日爲聖節受朝賀於是乎史臣具書之雖書之非古法
且夫忌日者君子終身之喪也春秋大夫至以從祖之
忌廢公事漢唐以還賢者廢酒肉辭攝祭其不肖者或
以匿忌罷官若是乎其重也此非孝子慈孫之所敢忘
也夫是故鄭重而書之而詳書其生年月日是奚爲者

耶考於經如此核於史如彼儒者爲文章號稱古文宜
安所取法耶宋後作者多不曉古法一大家能知之
而不肯言曰茅黃輩舉目皆是乃不意著書立說將勒
爲成例以示天下後世爲正鵠者而乃遷就古人之文
誤其屬讀如足下所舉云云也世有刻潘王黃三氏書
爲金石三例者吾家有其書劫後失之顧嘗記是三例
者皆不能言古大家之不書生年若誤讀昌黎文而反
有援爲例者則忘之矣足下所舉殆出蒼崖滋誤後學
不可無辨故論昌黎之必不然復抉其所以然以堅足
下之信抑足下告我謂在海上之疑吾言者始吾友郭

生郭生方遠志治古文雖區區末節其必當有心得而毋惑乎前人成說而過信之也是不可無并告之也五月二十四日某再拜

記王止仲墓銘舉例是全錄古人文以爲例而非瑣標名目者若黃黎洲博雅勝前儒其著金石要例恐不至於誤讀韓文故疑董君所述語出潘蒼崖金石例中後余復得三例果如所料此等名例原屬瑣碎讀古人文未必尋究到此故後來作者之書生年無足異也特三君旣將援古著例有意推求篇篇不書自當覺悟乃無一能言而蒼崖且誤讀而妄言之是

可怪已又按溫公書儀載志石刻文式但有某年月日終某年月日葬至朱子家禮始云某年月日生然則此法實壞於南宋者

與及門劉藝蘭書

凡吾無是書而假諸人也其不能妄有所評論宜也若插架吾固有發而讀之而思之而未必其無疑也疑而深思之而未必其無見也則何弗卽吾所見者而姑評論之其閒耶他日復發而讀之而見夫我之嘗論乎其閒也則必將取彼之所云而更思之卽我之所論而還按之而用力旣久未必不以向者之所論爲未善也則

又何弗自闢吾前說而重論之耶又他日復發而讀之而見夫我之嘗一論而再論之也則必將更取彼之所云與吾前後之所論者覆按而深思之而用力愈久彼此是非由是而可定矣語曰溫故知新禮曰敦學相長此其益殆有甚於師友之講貫而切磋者也今讀其書震其名而不敢疑也則是仍未嘗思也雖或疑之而震乎其名而不敢更以他義反覆之也則是仍未嘗疑也亦或有所見而終震乎其名而不敢以後生小子輕擬議之也則是仍未嘗有所見也夫未嘗思未嘗疑未嘗有所見而欲使所讀之書之有益於我也殆未可幾也

世之著書立說者往往好出新意詰難前輩此其人吾深惡之今乃爲斯言者爲學人用力者言之而非爲著述者道也夫我讀其書而一再論之至於用力之久而始知吾向所云者卒不如彼所云者之至當而不易也夫然後彼之云真不啻如吾之云而其書乃益於我矣而固不惟是震其名而已也又或反覆焉而吾之云未必不加於彼之云則不妨取而別記之雖他日以爲著述可矣而固非出新意以好爲是詰難也此讀書之一法也是下好讀書而過於迂謹一二名下之士深信其言而不疑端恭遜讓迥異浮薄雖然吾懼足下之隨人

而自局也故爲斯言進之若夫莢稗不熟動輒喋喋吾
惡之且不暇其又敢爲斯言以助其狂耶

烟嶼樓文集卷六

男隆壽平甫校字

烟嶼樓文集卷七

鄞 徐時棟同叔稿 甥葛祥熊豫齋校刊

傳

秦孝子傳

秦孝子者諱嗣瀛字一占鄞之西郭人少孤貧不能養母違其家五里爲人坐市列雖隆冬大風雪夜必歸母掩戶待之旣歸入侍母話一日已事雜刺取見聞爲權笑母倦始就寢日以爲常旣而娶婦不善事君姑姑婦有違言而未之知也一夜歸來入母室推戶戶闔瞿然而駭往詰婦得日閒勃僂狀大怒然性長厚且無如婦

何遽出反叩母氏室長跽戶外且跽且號母在牀呼就
寢跽且號如初母不得已起開戶納之跪牀頭百言慰
母母命之寢寢牀下旦日婦懼謝罪然後已一夜母盛
怒卒閉戶拒之不得入孝子跪戶外終夜隱聲泣母察
之無聲意已去姑就枕平明起開戶見狀驚抱持大哭
孝子跪膝下亦大哭婦聞感且悔前叩頭謝矢不敢亦
大哭鄰里驚起入門相問訊髣髴得一二咸歎息揮淚
去蓋孝子不能一日居於家每以母室之開闔驗婦之
孝謹而以長跪痛哭刑其妻不數年婦遂爲所化孝其
姑逾於常婦人夫孝庸行也夫豈惟稱詩說禮而後宜

踐之哉乃至性之發往往在編氓市井閒而逆親之行
販夫賈豎所不忍爲者又轉出於士類其故何也父久
在縲紲中百計求贖鍰不可得而厚擁其妻之嫁資而
終不一顧或咎之則曰是吾妻主之非我能與聞又曰
吾妻儉人也我豈得出其財而揮霍之此宜亦販夫賈
豎所不忍道而乃出自庠序人之口是尙得謂有人心
乎哉嗚呼以順若此以逆若彼又豈得相較乎哉久之
母病凡力所能爲者皆爲之母卒哀毀骨立每夜半起
拜北斗星四十有九凡四十九夜雖不無少惑然而其
志可哀矣

徐時棟曰孝子吾父友也年少未獲撰杖屨又不幸早孤未悉其行也長與其嗣君熙臣去來屢見必把酒道舊故顧不肯一語及先德殆爲母氏諱之耶爲母諱隱其父矣且其母卒孝婦也春秋大改過奚諱焉後余得其事於周君維增是日座有述某生事相告者心惡之周君曰此殆謂婦人不可化耶因語孝子之詳如此周君又曰以孝子之愿朴而不言而勸不怒而威斯其誠爲之也至誠未有不動人者則夫人豈有不爲至誠動者時以爲知言

王孝子傳

王孝子學旦字景周鄆之句章鄉人生四歲而孤母氏阮守節撫之稍長事母謹母夜織挑燈隨之讀旣冠取於劉其年遇火諸父力遷張陳皆倉皇而大父棺方在堂孝子急呼妻黨與母同昇大父棺及扶足踏扶棺自足上過裂跣出血而已未之覺也未幾與諸父異爨自以身爲寡婦之子終讀將累母以家政乃廢書指家日理瑣屑夜侍母言笑不命去終弗去母或不歡力勸慰之或怒未及理長跪請罪旣而劉卒繼之以楊偶不相說曳杖率婦跪母前至老而事母猶常常如此始劉生子女各一母以無女視女孫如女劉卒尤愛憐之嫁於

陳一年而歿母哭泣哀思成疾每疾發氣上逆不省事
百計調護之不得治焦思傍徨亦得狂疾者三月母既
喪女孫愛女孫婿女孫婿來開說之病得解以是屢召
婿視母所以待婿甚厚外家貧不懈存問爲舉其喪營
冢塋他日母歎曰未亡人有此兒無恨於寡矣久之以
母苦節聞得旌如例孝子卒後十餘年其婿陳某來請
傳書其皃皃大者

贊曰方余避難懸慈村過修源寺遇王君始知其先人
爲吾先君故交乃今而知孝子也余嘗傳父友秦孝子
童時又竊聞先君言湯丈之山左覓父柩屈指先友無

媿至性者逮茲三矣夫至誠至德古今所難若家庭順親之行士大夫謂恆常無奇異不足表暴於世其所論議行誼至高但崇空語而割股廬墓矯激之行又相與色喜稱道之著述家沿爲例焉而不可破夫謹身節用以養父母經所謂庶人之孝也而必尙之抑獨何哉貝清江云人子事親始終盡道者不足書特於其遇變書之按此實文人好奇之過也凡作文字必思有以興起後世若但傳遇變之人則安常處順者皆將藉口於遭逢之幸而不足以動其自反之彝良觀感無由人心所以日媿至性所以日薄也曾閔至孝古

今無異詞而孟子稱曾子只是以酒肉養父夫子稱
閔子只於其父母昆弟之言證之似乎芸瓜衣蘆世
所傳家庭之變皆屬附會然則二子之孝亦不過始
終盡道耳且始終盡道談何容易而尙不足書耶聖
賢立教至中至庸人人可以則倣非如後世文家矜
奇炫博務爲撈獲而無當於勸懲之義也友人讀此
傳謂其人平平無奇不得題以孝子故特附論之如
此

周抑齋先生傳

周先生良劭字友高學者稱抑齋先生生三日父端翁

持燭逼視之目光炯然旣離文葆試授之讀誦聲與端
翁琴聲相上下端翁不羈士善鼓琴常走通都一日在
杭州寄時食餉諸兒母以餽嫺黨不之告也旣而歸從
容問曰吾他日貽兒曹食味何如諸兒倉皇不能對先
生遽曰美甚兒至今猶在口也長肄舉子業不肯習時
好充鄞學增廣生屢試不第遂棄其業專力於詞章或
酒後命筆酣歌一曲慷慨涕沾襟其他星厯音韻句股
壬遜之學殫精竭慮皆有撰著而未成書又以餘力爲
書畫篆刻見者珍如拱璧而已爲強弩之末矣至性惇
篤事父母以孝聞端翁歿先生不能治生產而館穀所

入時分諸兄仲兄早卒孤寡力任之見人無貴賤必以禮知交或改轍苦口箴規之卒不聽始絕他日母迫之就試旣去而母病先生在省中忽心動急歸中途冒大雨得寒疾居喪又毀瘠過哀未數月竟死余觀先生氣甚豪顧乃最奇離騷經每讀已大哭哭已復讀又召門下士善哭者來與呼哭相應和當是時則自以天地之大而我乃蝨乎蠕動其中況又重之以古今之感往來代謝皆若與我無親比焉者悲從中來長哭不止故其於老莊列禦寇之言皆有深契而流連往復之不能自解以至於死可不悲夫死時年三十九門下士哀之歲

以五月七日爲魚菽之奠積十餘年近今亦稍衰矣仲子宏縉與余善亦礪礪有奇氣

徐時棟曰余讀先生所作壘硯杯得失之際何其悲也世徒以繩墨求之過矣始予少時先生來吾家自門隙闕之高論若無人焉壯觀其文辭又何落落無凡響也烏乎儻所謂未見其止者乎

陳西耕先生傳

辛丑

先生諱濂字逢侶號西耕先君子遇事必商篝燈寒夜娓娓不倦先君子與客夜坐則令兒輩賦詩侍長者或座上客滿發言盈庭未有定論先生不大聲色決之以

理度之以情參之以世變事無周章從容而理之余每聞先生言雖不解所謂未嘗不歎其才之能鎮以靜也先生始爲諸生文詞磊落傾其曹郭公文鏐令於鄞下車采風以先生冠多士甚許其才且期之至厯試不第淡然置之世無知先生先生亦不欲自見於世而先生遂以明經老矣吾鄉中秋後天下一日先生以是日生往歲先生年七十賓客將壽先生忽買棹抵黃公林拜漢黃公曰鄉先生廟祀於此不可以生年七十而未有謁也旣歸意若有所動疾作踰月而卒先是嗣君勸中拔萃科外用方捧檄走粵西而先生大病幾死明年告

歸省親先生無恙也未數月先生沒沒期年而鄞有逆
夷之變流離患難老成多抑鬱以死而先生不祈於祝
宗而已脫於奔亡之厄嗚呼先一年而死與後一年而
死皆將不得成禮乃今而知天之待先生者厚也先生
之卒也鄉黨嗒焉喪之而余思先生而重有哀焉少時
好勇而惡懦一日忽不得意於邏卒思所以辱之適先
生自外來問曰何以有怒容告之故且與之謀先生笑
曰少年盛氣哉雖然子未知爲諸生之難也守其身如
處子而不敢與知其他猶懼非笑之入吾耳也如臨深
淵如履薄冰子之先人終身誦之曾未之聞耶先生旣

卒勸復與余交請傳先生申之而未報也喪亂以來始克爲此夫豈惟前諾不敢忘先友之感實往來於吾心抑不肖幼孤失教求覩老成人之典刑而未易得冒不韙之名亦悔於厥心嗚呼此余所以記先生遺言而不能不愴然於懷也辛丑十一月朔徐時棟撰於它山

長者王東亭翁傳

國朝乾隆間鄞有長者曰王東亭翁諱宏詩字昌言國子監生父成璫母張氏生六子二女翁以長男搢家塵身居積得稍贏餘及壯未昏或勸之曰我五第二妹方幼少我有室難兼顧矣年二十三始娶以次爲弟妹畢

昏嫁而治居宅分界之事親極甘旨婉容孺慕沒身不
衰父晚歲苦風病手治湯藥者七年第五弟中年而風
不能理生產翁資其家終身女弟適陳三年寡撫孤子
爲之娶妻戚友告匱視親疏緩急爲飲助蓋於三黨竝
粲然有加惠云翁伯叔父三人皆貧無子皆後翁諸弟
養生送死皆翁力任之旣而舉其喪泊其妻妾凡七棺
葬石山街與父墓在鹿山者望曰地相近如此我子孫
來祭吾父墓拜掃之易耳歲時忌日祭其先必誠且敬
以及其先世旁支之無後者謀創建祠堂買地西郭稍
鳩貲爲畜積迄翁子卒成之嘗歸自會稽與同邸客竝

舟機百官鎮邸人誤以十千錢投翁舟既歸始覺驚曰
此必有冤死者卽買舟行二百里達前邸而客方意舟
人盜錢下諸吏將賣女償矣翁至事得解年四十六始
生子又十年生仲子課之綦嚴其後伯以積學勵行聞
仲髫年成諸生翁歎曰吾貧故失學吾二子成名無憾
矣嘉慶元年遭疾幾殆伯子刲臂肉進病間會母氏以
九旬考終翁哭泣哀思病復劇十餘日亦卒享年七十
夫人吳氏子二伯大綱縣學生贈蕭山縣儒學教諭仲
大緯嘉慶二十三年舉人揀選知縣孫四人仲孫棻道
光十九年舉人今司訓蕭山與吾家有連曾孫十七人

其四人方有聲庠序閒

贊曰翁不反遺錢誰知之知亦誰責之而舟人之子殆
矣甄彬歐陽頴以還金盛傳史氏彼未嘗於人骨肉有
損益也而翁益長者矣孝弟爲仁本觀於翁尤信王氏
在明初有諱道之者與其弟刑部主事敬中始分支由
道之傳十世至翁大父四百年來一支而已餘支不旋
踵皆絕翁大父有子四人父有子六人亦或絕或僅存
存者亦微乎爾而翁之後獨以孝友詩書世其家天之
所壞不可支也以翁視其餘亦薄祚焉耳而盛衰若此
嗚呼孰謂天道杳茫而不可問耶

朱青石傳 己未

青石諱文杏字午橋鄞人父瑤甯波府學生爲縣大師有名青石少孤貧爲人抄書入慈谿巨家主人使寫袁枚駢體文青石爲點竄其使事錯誤者主人見之驚曰若非書傭何爲而在此以貧困告主人且喜且憐之曰始吾慢子子吾友也改容禮謝遽延之爲上客由是發其家藏書徧讀之性彊記過目恆十行下時盛行考據之學青石意不屑嘗笑曰是瑣瑣奚爲哉他日見朱氏經義考則又曰此一月而可成書者其大言多此類始學爲經解成諸生有賦家謾侮之青石大恚立棄去學

駢體詩賦又高出儕輩顧以貧故常爲人捉刀學使者
試菊影賦青石旣爲人成三篇日下稷矣已卷空無有
倉卒寫數百字投卷以出明日甲乙下三賦皆高等而
青石名第一皆譁然怨青石爲人謀不忠及取其自爲
賦讀之又心弗善也嘗謂天下事無難能而紛紛者敗
之諸君或聚議庠序去之不少顧自負經濟才人莫肯
信之而任氣敢言慷慨論氣節每以意孤行其所難不
終計成敗亦不求人知也館象山石浦村爲浦中興大
利浦人爲之建生祠余聞而怪之以問青石青石笑不
答道光十九年有妄男子發王桃源先生墓問官哀矜

之士大夫交起成大獄會巡道李公紹昉課諸生雲石
山房青石與焉乃爲駢體文一篇獻之大略言先生宋
大儒墓發而守令仁慈將激變公以告問官始用嚴刑
得其情事定眾攘臂論功而不知青石之與有力也其
讀書亦不爲門戶之見好觀大略通其意而止嘗除夜
坐余家烟嶼樓余方用故事祭長恩驅書蠹青石與余
兄弟共聯句爲詩有曰寢饋於其中粉碎破虛冥字字
必咀嚼敗壞先聖經甚於厄秦火殺之有餘腥噫考据
之學其流弊未必不至是而疾之已甚遂乃以激切形
語言蓋其意趣如此故其得失亦半之四部之書問之

皆了了窮之則窒而世遂欲以目錄才子謂之則苛論
矣余嘗勸青石下帷遜志稍事著書雖草稿劄記中未
必無一二精到語可詔後世而東西奔走老困衣食語
言文字無足傳者是則可爲青石長歎息者也青石貌
奇古面崎嶇如五嶽飲酒少許輒脫帽汗雨下氣蓬勃
自頂上出望之如雲興於山晚歲不得志被酒罵坐往
往對嚴武呼挺之每來吾家座有他客則余必強制之
青石固不余怪然過從漸稀未幾而青石死矣卒於咸
豐七年某月日年五十有八子二正傳正芸卒之前一
日尙以賣賦就試日昏黃或見其跛蹙出場屋明日遂

卒石浦諸弟子方以試事在鄞乃與鄞人相率斂葬之
青石所著既不傳傳者率駢體詩賦酬應之作菊影賦
世勿善也獨蒼涼有古意爲點定而存之雖然青石卒
潦倒貧賤不遇以死讀其賦亦可以知其人矣其詞曰
落落疏疏蕭蕭槭槭是影是花爲人爲菊散漫兮遠岫
欹斜兮短闌冒雨兮初開經霜兮未殘顧乃顛狂笑傲
跌宕風流亭臺顧盼山水優游烟雲恣其揮灑星月與
之夷猶伊半醒而半醉羌雨秋而風秋旣若隱而忽見
乍將去而復留朝而出兮園東暮而歸兮籬右曉吾見
其入簾午吾見其窺牖或逢人兮寫眞時邀月兮舉酒

刪俗態兮盡無釀花意兮都有柰何哉麤服亂頭殘衫
破帽孤雁淒清西風罷耗客或未來人所不到古處爲
歡對影自悼孰尋我於無影之影竟指我以不傲之傲
此豈凡品是爲古狂放浪遊戲閱歷風霜憐爾嫋嫋視
我茫茫有神無迹形與影忘嗟乎噫嘻秋思可悲花影
人影一枝兩枝是耶非耶何翩翩其來遲我婆娑而起
舞花動搖兮迷離尙顧影而自愛謂人澹兮如之

贊曰海濱有地曰白塗多煮鹽亭戶青石祠在焉始竈
民受制於其商青石爲平之商怨青石而竈民盛德之
不衰一日方斬牲陳優羅拜塑像爲青石壽而青石適

至眾大喜驩呼擁青石坐像下歌舞酣笑竟日夜及青石既卒或見其自海上騎白馬入祠中迹之不可得村民益神之擲杯玦獻雞酒無虛日噫青石其信爲神也耶余聞之石浦人云

姚梅伯傳

梅伯姓姚氏名燮鎮海人生周歲未能言而識字二百餘坐大父膝頭手指無謬者有客過其父梅伯方五歲索佩囊不與而啼客笑曰能作燈花詩當與汝琅琅賦五言二韻客大驚解佩囊去梅伯以絕人之資讀書恆十行下自經傳子史至傳奇小說以旁逮乎道藏空門

者言靡不覽觀既成孝廉公車北上則出其才交天下
士士無不知鎮海姚生遊覽閱歷日益多交益廣譔述
益富才益奇客中金盡不得歸拉雜畫數十紙投有力
者旦日視之策馬行矣道光二十三年大病幾死養病
郡之報德觀忽大曉悟取生平綺語十數種摧燒之自
號復莊是歲余客杭州有傳梅伯死者比歸知無恙過
之觀中方作道士裝爲人懺悔相視而笑出手注玉樞
經淪茗其讀余嘗評梅伯所著駢體文第一詩次之填
詞又次之餘所橫溢皆可觀傳人也而梅伯自言有詩
萬餘首遴之至三千可以視古無媿色聞者笑之余固

知梅伯言不妄也

建隲唐四傳 丙辰

建隲在鄞西南錫山之下唐氏童氏族居之咸豐六年夏有竊盜入唐志喬家覺而逐之遡唐四者其傭也聞呼聲驚起袒裼執菸幹往追盜及諸野手握盜頂髮而以餘辮弮臂上盜不能脫固哀之不可盜怒出小刀擊其臂四左手以菸幹格之盜愈怒亂刺胸腹間一刀中其心會家人蹤跡至四大呼曰盜在此吾死矣勿縱盜眾爲解臂辮而縛之四徐徐取腰繫巾自捫其心腹良久始仆目怒張左手執菸幹如故

徐子曰建隲山僻也孝女童八娜有傳在宋史相距六七百年而有義傭唐四者出焉夫四得於主幾何主所失於盜又幾何而必發憤而以身殉之則夫平日所得既倍於四萬萬一旦其主所失且倍此不啻萬萬者又當何如耶人皆曰予知而四獨愚異哉余嘗問志喬以其名則曰未讀書故無名是尤可異矣

李縫人及買杖者傳

壬戌

李縫人者鄞人少孤善事母無何母死遇忌日不事事雖急而召之莫能強也晨起掃室布几筵焚香獻茗告而去至市上徧覓向嗜好買以歸手捧饌進之而侍立

其側箸夾饌置母前曰阿母食之今日買諸市尙新鮮而價廉阿母食之已乃反饌於器泣曰母不能食矣則哭以至卒獻皆如之將徹舉近所爲諸事娓娓白母曰阿母誨我則又泣曰母不能誨我矣遂慟哭而歔歔太息涕被面者竟日也始家人驟見之以爲狂數見不復怪久而大家戶知之遇是日輒不召皆曰李縫人之母之忌日也

鄞有弊政曰買杖縣官坐堂皇集稅吏催科吏度是日當被杖則易一人代以入每一杖錢幾何官不之察也雖覺弗禁縣治之側有孤子者貧甚而母風起居轉側

皆需人已深念曰吾不辭行乞顧誰侍我病母者或告之曰若養母而不能離母此與母俱死耳縣中有買杖者爲時暫而得錢易可爲也泣而諾之而戒之曰召我慎勿使吾母聞也於是日得甘旨奉其母母詰所自詭而對將出必以果餌菸菴及母所需置牀側掩戶而去去俄頃旋反雜里巷瑣屑語告母時或爲優人歌舞嬉戲母前母喜而笑則撫掌共笑夜卧牀下聞聲躍而起其母歡樂受養幾三十年而終不知其子之代吏而受杖也母死衣衾棺槨備旣舉喪與其父合葬遽削髮逃去不知所終

贊曰先王制禮以忌日爲終身之喪士大夫素服謝客徒具文耳乃不意縫人也而深知禮若此彼養其親而毀其身者又何不知禮之甚耶夫彼則固已環念焉而計無復之而以爲不毀其身之必不足以養其親也故忍而出此而又未嘗不知夫養其親之必不可以毀其身也故母死而遂爲僧則吾又深怪夫郡縣之大數十年之久而曾無一人焉憐而告之而拯之而使之終出於是其志可哀其遇尤可痛也嗚呼若縫人者足以風矣

烟嶼樓文集卷七

男隆壽平甫校字